

## KEN HONGPHAWK KHA LO!

Isaiah 12:2 "Amah kamuang dinga kalau ngeikei dinghi. Banghanghiam cih leh Topa, keima Pasian in, katha hatna leh kamuanna hi a, amah in keima hotkhatna ahihi."

Topa ka Pasian in, kathahatna leh keima hotkhatna hi ci in um napi in, banghangin lam khialin tuuk in, banghangin lunggimna in kei hongtuam zel hiam?

Misiangtho Padre Pio (St. Padre Pio) in hih ci bangin honghilh in, tha hongpia hi:

I lungkham in, i lunggim tawntung hi. Banghanghiam i cih ciangin, bangbang i sem a, bangbang i bawl zongin, bang bang i ngim a, bangbang i geel zongin, ei ngaihsutna, eideih na bangin hongpiang khin ngeilo hi. Tua banghun ciangin kilungkham in, ki lunggim in, kithanem a, i paina lampi nangawn i khialhlawh thei hi. Sunkhuavak lah khimzing bang in, zankhuamial in hongbehlap lailai hi. Lungsing khua zingin khawl hun neilo in, eite hong hencip a, tawldamna in tuipi gal ah hongkai san hi. Tuabang hun ciangin ei mathu bek i lungngai a, khuavak tawh iki gamla semsem hi. Hici bangin liangvai in, cihnang thei lo a i om ciang in, mi dot kullo in, ei le ei thu tampi iki donga, dawn nang i thei tuan kei hi. Dong khial leng kidawng theilo in, dawngkhial lengzong salsuahna hong hi zel hi. Tua hi a, ei le ei kidotding thu te in:

Ka ngimna le kageel nate kasepkhatna ah, Pasian' tha bangzah kazang hiam, bangzah kamuang hiam, bangzah ciangin kaphawk kha hiam, ka ngaihsun ngei kha hiam. Topa' muanna hangin kasem hiam, ahih kei leh, mi muanna leh ei le ei kimuanna hangtawh kasem kabawl zawhiam? Tua banga sepna bawl na te ah, Topa in keima Pasian hi a, kathahatna leh keihong honkhia Pa hi cih thu in, kei bangzah ciangin hong mapi hiam. Lamkhat panin gen lehang, kahatna ahi Topa tha kazang thei hiam, Topa' tha bangzahin kamuang hiam, bang

zah in kabel hiam? Hih thu te ei le ei i kidot takpi a, lungsim kiniamkhiatna taktawh iki sittel a leh, Topa aw, hongmai sak in, kahatna leh keima kihotkhiatna nahih lam hongthei napi in, ka kamin Topa honglo in, kakhuak in, Topa kongtheih hangin, kanuntakna le kahihna khempeuhte ah, kongmangngilh den tazen hi. Topa aw, hongmai sak in ci a, thumdinglo ngal, na gending nathei nawnkei dinghi. Tua hi leh, Topa in, na thahat na, hong honkhia Pa hi napi in, nang mah in, amah bello, muanglo, kin lo, awlmawh lo, phawk lo nahih lam naki phawk dinghi. Hih thu nakiphawk ni leh hun in, Topa aw! ken hong phawk khalo hi ing ci-in na thuumtheih leh thupha ngahmi na hihi.

Ref.

Padre Pio's Words of Hope, ed. Eileen Dunn Bertanizetti, (Huntington, Indiana/IN: Our Sunday Visitor, 1999). 132.